

# POPERA GA FIREMÚCAX

## NAXÜMATÜXÜ GA PAURU

---

### Firemúxü narümoxê ga Pauru

<sup>1</sup>Pa Firemú i Cuxü Tangechaügxê i wüxigu Tomaã Puracüxe, chama i Pauru i Ngechuchu ja Cristucax pocuxe rü taeneê i Timúteumaã cuxcax tanaxümatü i nhaã popera. <sup>2</sup>Rü nhaã popera rü naxcax ta nixĩ i ngêma taeneêgü i cupatawa ngutaquëxegüüxü rü naxcax ta nixĩ taejax i Ápia rü taeneê i Ariquípu i wüxigu tamaã Tupanaãxü puracüexü. <sup>3</sup>Rü chanaxwaxe i Tanatü ja Tupana rü tórü Cori ja Ngechuchu ja Cristu pexü narüngüxê rü pexü nataãêxê.

### Firemú rü aixcuma Ngechuchuaxü najaxô rü jema jaxôgxüxü nangechaü

<sup>4</sup>Rü guxüguma i ngêxguma cuxna chacuaxächigu i chorü jumuxêwa, rü Tupanana moxê chaxã cuxcax. <sup>5</sup>Erü nüxü chacuáchiga na nhuxäcü nüxü cuxaxôxü ja tórü Cori ja Ngechuchu rü nhuxäcü nüxü na cungechaüxü i guxüma i duüxügü i Tupanaärü ixigüxü. <sup>6</sup>Rü Tupanana naxcax chaca na cuxü nangüxêëxüxü na duüxügüma nüxü cuixuxüxü na

nhuxäcü Cristuaxü jaxôgxüxü i jixemax, erü chanaxwaxe na meã nüxü cucuáxü na nhuxäcü Ngechuchu ja Cristugagu poracü tüxü nangüxêëxü ja Tupana. <sup>7</sup>Rü chama rü poracü chataãëxüchi na nhuxäcü nüxü cungechaüxü i ngêma jaxôgxüxü. Erü cugagu nixĩ, Pa Chaueneêx, na nataãëgxüxü i ngêma togü i jaxôgxüxü.

### Firemúxütawa rü Onéchimucax wüxi ga ngüxêëcax ínaca ga Pauru

<sup>8-9</sup>Rü ngêmacax nangêxma i wüxi i ngüxêë i cuxütawa naxcax íchacaxchaüxü. Rü dücax, Cristu nixĩ ja choxü mucü rü ngêmacax choxü nangêxma i pora na cuxü chamuxü na cunaxüxüxü i ngêma ngüxêë i mexü i tá cumaã nüxü chixuxü. Notürü tama ngêmaäcü cuxü chamuxchaü erü cuxü changechaü, rü ngêmacax chauxcax narümemae nixĩ na cuxü chacaaxümarexü naxcax i ngêma. Rü chama i Pauru rü marü chaja rü nhuxma rü chapocu Ngechuchu ja Cristucax. <sup>10</sup>Rü ngêmacax cuxna naxcax chacaxchaü i wüxi i ngüxêë naxcax i Onéchimu i nuã pocupataüwa chauxütawa Cristuxü

jaxuxũ. Rũ ngẽmacax i nhuxma rũ  
Tupanaãrũ orewa rũ chaune nixĩ. <sup>11</sup>Rũ  
ũpa ga Onéchimu rũ wũxi ga curũ duũxũ  
ga taxuwama cuxũ mexũ nixĩ. Notürũ i  
nhuxma rũ cuxũ rũ choxũ rũ ta name.

<sup>12</sup>Rũ nhuxma rũ cuxçax chanataeguxẽẽ i  
nũma i Onéchimu. Rũ chanaxwaxe i meã  
cunajaxu, nhama choxũ cujaxuxũrũũ.

<sup>13</sup>Chierũ chanaxwaxe na nuxma  
chauxũtagu naxãũxũ, rũ na cuchiciũ  
choxũ nangũxẽẽxũçax i nhuxma na  
chapocuxũ naxçax i Tupanaãrũ ore i  
mexũ. <sup>14</sup>Notürũ tama chanaxũchaũ i  
tacũ i taũta “Ngũ” nhacuxũ choxũ. Erũ  
ngẽma ngũxẽẽ i cuxna naxçax chaçaxũ,  
rũ chanaxwaxe na curũ ngũchaũtama  
jiĩxũ na cunaxũxũ i ngẽma rũ tama i  
chorũ mugagu na jiĩxũ. <sup>15</sup>Rũ bexmana  
Tupana nanaxwaxe na paxaãchi cuxna  
jaxũxũ ga Onéchimu na jixcama rũ  
wenaxãrũ cuxçax nataeguxũçax rũ  
ngẽmaãcũ guxũgutãma cuxũtaw  
nangẽmaxũçax. <sup>16</sup>Notürũ i nhuxma rũ  
tama ngẽxũrũxũmare i curũ duũxũrũũ

nixĩ, erũ wũxi i curũ duũxũãrũ jexera  
nixĩ i nhuxmax, erũ taeneẽ i nũxũ  
ingechaũxũ nixĩ. Rũ aixcuma poraãcũ  
nũxũ changechaũ i chamax, notürũ  
maneca i cuma rũ jexeraãcũ nũxũ  
cungechaũ. Erũ nhuxma rũ tama wũxi i  
curũ duũxũmare nixĩ, notürũ wũxi i  
cueneẽ i tórũ Coriaxũ jaxõxũ nixĩ i  
nhuxmax. <sup>17</sup>Rũ ngẽmacax, rũ ngẽxguma  
choxũ cudaxgu na aixcuma cueneẽ  
chiĩxũ, rũ chanaxwaxe i meã cunajaxu i  
Onéchimu, nhama choxũ cujaxuxũrũũ.

<sup>18</sup>Rũ ngẽxguma tacũ rũ chixexũ cumaã  
naxũxgu rũ exna tacũ cuxũ nangetanũgu,  
rũ chanaxwaxe i chamaã nũxũ cuixu na  
nhuxre jiĩxũ, na chamatama cuxũ

chanaxũtanũxũçax. <sup>19</sup>Rũ chamatama i  
Pauru rũ çaxmexmaãxũchi  
chanaxũmatũ i nhaã popera. Rũ aixcuma  
chamatama tá cuxũ chanaxũtanũ. Rũ  
tãũxũtãma cuxna nũxũ chachuãxchixẽẽ  
na nhuxãci choxũ cunangetanũxũ i curũ  
maxũ i taguma gũxũ i chaugagu  
Tupanaxũtaw cujaxuxũ. <sup>20</sup>Rũ  
ngẽmaãcũ, Pa Chaueneẽx, rũ  
chanaxwaxe i tórũ Corigagu chauxçax  
cunaxũ i ngẽma ngũxẽẽ. Rũ chanaxwaxe  
i choxũ cutaãẽxẽẽ, erũ chaueneẽ i  
Cristuaxũ jaxõxũ cuixĩ. <sup>21</sup>Rũ cuxçax  
chanaxũmatũ i nhaã popera erũ nũxũ  
chacuãx na aixcuma chauga cuxĩnũxũ rũ  
tã cunaxũxũ i ngẽma cuxna naxçax  
chaçaxũãrũ jexera. <sup>22</sup>Rũ ngẽxgumarũũ ta  
chanaxwaxe na chauxçax cunamexẽẽxũ i  
wũxi i nachica i ngextã tá nawa  
changuxũ. Erũ íchananguxẽẽ na Tupana  
tã nangãxũxũ i perũ jumuxẽgũ, rũ tá  
choxũ nangũxẽẽxũ na pexũ  
íchajadauxũçax.

**Pauru rũ wenaxãrũ Firemúxũ  
narũmoxẽ rũ naxçax ínaca na Cori  
ja Ngechuchu ja Cristu nũxũ  
rũngũxẽẽxũ**

<sup>23</sup>Rũ moxẽ cuxçax ngẽma namu i  
Epáfra. Rũ nũma rũ wũxigu chamaã  
napocu naxçax ja Ngechuchu ja Cristu.  
<sup>24</sup>Rũ ngẽxgumarũũ ta moxẽ cuxçax  
ngẽma namugũ i Marcu, rũ Aristãcu, rũ  
Dema rũ Luca. Rũ nũmagũ rũ  
chamũcũgũ nixĩgũ i Tupanaãrũ  
puraciũwa. <sup>25</sup>Rũ chanaxwaxe i tórũ Cori  
ja Ngechuchu ja Cristu pexũ  
narũngũxẽẽ i guxãma i pemax.

*Rũ nuãma cuxna,  
Pauru*